

MATURASAUN IHA KAMPU AFETIVU

*«Na'i, hanorin ami atu sura ami-nia loron sira, nune'e ami bele to'o iha sabedoria fuan nian»
(Salmu 90,12)*

Tanba sá mak maturasaun iha kampu afetivu importante liu iha individuu nia moris? Atu komprende, ita presiza fó definisaun ne'ebé loo's kona ba saida mak afetividade.

Hanesan Stevani Milena afirma iha ninia livru: *Per Una Autonomia Affettiva della Donna Consacrata*. Afetividade nu'udar bee-matan enerjia ne'ebé estimula/dudu atividade umana no, se individuu hatene uza ho modu adekuadu, bele fasilita relasaun ekilibriu ho an rasik no ho ema seluk.

Afetividade mak individuu nia kapasidade atu experimeta sentimentu sira no emosaun sira la'o hamutuk iha relasaun individuu nian; atu enfrenta no estímula laran (interiór) no li'ur (esteriór) sira. Inklui aspetu husi sentimentu no reajen ba sira.

Defaktu, individuu bele experimeta sentimentu sira ne'ebé luan: domin, ódiu, satisfasaun, dezgostu, ternura, ksolok, ta'uk; no nesesidade sira ne'ebé desizivu: seguransa, aprovasaun, konsiderasaun, no estima.

Tuir mai, ita ba haree oinsá pasajen graduál sira iha maturasaun afetiva.

Maturasaun afetiva individuu nian, hatudu liuhusi pasajen graduál ne'ebé implika superasaun progresiva husi atitude ruma: Kreximentu umana no espirituál iha etapa adulta.

Etapas sira moris nian: hatudu momentu sira hilin nian no momentu maturasaun/kreximentu nian. Ba ita, ne'ebé moris dadaun iha tempu ne'e, eventu sira istória nian mak nu'udar fatin iha-ne'ebé ita hatene loke an simu Maromak Nia mistériu no Ninia projetu iha ita ida-idak nia moris.

Defaktu, iha ita-nia dezvoltimentu no kreximentu ezisténsia nian, ita hasoru faktu sira husi situasaun oin-oin ne'ebé partikulár no signifikativu mai ita, no ba ita-nia koñesimentu kona-ba ita-nia an rasik.

Ne'e mak pasajen sira ne'ebé empenhativu, no tanba ne'e difisil, baibain ita hanaran krize no mós ita bolu nu'udar dezafiu sira, tanba ne'e eventu sira ne'e sadik ita atu reflète; ne'e mak apelu sira halo ita hateke ba oin, atu bele supera no atu buras iha interioridade rasik; ne'e mak momentu sira ne'ebé lori ita ba maturidade.

Eventu sira hotu ne'ebé akontese iha ita-nia moris, tulun ita atu sai konxiente katak ita mak ema ne'ebé la'o iha estrada kurva ida, iha dalan umana ho espirituál ne'ebé estimula individuu atu halo no foti desizaun. Importante mak rekoñese eventu hirak ne'e, hanesan sabedoria greka dehan: «kairòn gnothi». Tempu ne'e mak partikulár no auténtiku husi kairoi, momentu importante no momentu sira fertil/fekundu: momentu sira ne'e dehan: sé mak ha'u?; ha'u la'o ba ne'ebé?; no oinsá ha'u fó resposta?

Ne'e la'ós faktu sira típiku no eskruzivu iha esperiénsia umana; maibé ne'e hola parte mós vida espirituál no esperiénsia relijioza, hanesan esperiénsia iha Biblia.

Tuir mai ita haree relasaun autêntitika sira entre dixípulu ida-idak ninia esperiênsia ho Mestre no mós Amigu ida. “Jezús husu ba Pedro.” Simão ó hadomi Ha’u?” Nu’udar indíviduu Simão fó resposta ba diálogu ne’e. Maibé ita haree lia-husun ne’ebé hanesan ba dala tolu, nu’udar dezafiu ida ne’ebé Jezús halo ba Pedro. Ho livre Pedro hatán: “Na’i Ita hatene katak ha’u hadomi Ita”. Husi Pedro nia resposta hatudu ninia maturidade afetiva ne’ebé kle’an (Jo21:15-19); Paulo: “Bainhira nia la’o tuir dalan Damasco nian, nia monu husi kuda no sai matan delek, no rona Lian ida bolu”... simu no sai ema foun ida (At 9:3-9). Paulo nia esperiênsia konversaun lori nia tama iha maturasaun umana ne’ebé kle’an, autêntiku no realizada.

Iha figura rua ne’e, Pedro no Paulo nia esperiênsia moris nian, konfirma katak hun husi ema ida nia fidelidade, ita hetan iha ema ninia maturidade atu konsagra an ba Maromak atu serví ema seluk.

Mai ita ba haree FERRARI nia esplikaun kona-ba prosesu ema ne’ebé halo ninia dalan ba maturasaun maski ho idade ne’ebé boot (katuas). Foti ezemplu husi istória Nikodemus nian (Jo 3:1-15).

- Nikodemus hakfodak liu ho Na’i Jezús nia pregasaun; sente katak tenke halo buat ruma, nia ba hasoru Jezús (iha kalan) la’ós atu husik Jezús troka ninia moris, maibé atu fó konfirmasaun ba ninia seguransa (lei nu’udar bee-matan moris nian).

- Maibé Jezús dezafia nia atu troka nia moris, atu «moris fila-fali» iha Mistériu Inkarnasaun no Paskál nian («Maromak Oan Mane foti sa’e iha Krús» ne’ebé fó moris ba sira ne’ebé hakbesik ba Nia).

- Nikodemus hetan susar atu fiar no atu husik ninia seguransa sira, atu simu proposta foun: nia katuas ona, nia fiar halo ona dalan hotu ne’ebé nesesáriu, nia la fiar iha possibilidade, nia lakohi husik ninia serteza sira atu ba hasoru risku fiar nian.

- Maibé atu manán ninia salvasaun, nia tenke halo ain-hakat ba oin ho buat ne’ebé Jezús husu ba nia atu halo, ikusmai, ita haree katak provavelmente nia halo duni ain-hakat sira: nia rekoñese iha Jezús Liurai Israel nian. Ita hatene katak iha loron ne’ebé ema hatuun Jezús husi krús, Nikodemus sosa ba Jezús mina-morin ba liurai: «lori mina-morin no aloés besik libra atus ida» (Jo 19:39).

Liu husi reflesaun ida-ne’e, propoin mai ita nu’udar indíviduu atu fó resposta ba pergunta hirak ne’e: bainhira mak ha’u hasoru momentu partikulár hirak ne’e? Oinsá ha’u rekoñese? Oinsá mak ha’u supera? Iha konstante ruma, katak iha sujestaun balun ne’ebé bele fó mai ita nu’udar indíviduu, atu halo dalan ne’ebé fó fuan barak iha etapa sira ne’e iha ita nia-moris?

Pasajen hirak ne’ebé ita haree ona iha leten mak: pasajen sira empeniativa liu iha ita nia moris, keta konsidera nu’udar elementu negativu, maibé elementu poztivu sira; faktu hirak ne’e la’ós estrañu maibé hola parte prosesu kreximentu umanu nian.

Tuir matenek-na’in Stevani Milena ho Ferarri Gabrielle sira-nia reflesaun, fó mai ita hanesan odamatan ida ne’ebé nakloke ba orizonte moris umanu nian.

Hanesan FERRARI iha ninia livru afirma katak: iha abut fidelidade nian, ita hetan ema-nia maturidade atu konsagra an ho ksolok ba Maromak no liuhusi servisu ba maun-alin sira; no elementu nesesáriu liu mak indíviduu tenki to’o nivel ida ne’ebé aas iha maturasaun umana.

Konsagrasaun ba Na'i iha Nia Kreda ezije “bolun” iha kapasidade atu saran an: signifika hadomi autentikamente ho enerjia no ksolok. Ne'e katak ita labele sai konsagradu/a loos, se ita seidauk konkista maturidade afetiva ida, iha pessoa global.

Defaktu, maturidade indispensavel ba moris relijioza, ita hatene katak ne'e mak rekerimentu ida husi natureza konsagrasaun nian.

La'os fasil atu tuir Kristu, se ema ida kiak iha vida afetiva iha idade evolutiva, tanba falta ne'e bele impede ema ba liberdade interior, no mos la moris iha profundidade.

La'os fasil atu simu ho hakmatek/serenidade moris kastidade nian, obediensia no pobreza nian: konfliktu bele mai husi renunsia sira ba buat furak sira mundu nian (domin kaben-nain nian, direitu atu organiza an rasik no ba soin temporal); husi parte seluk individu la iha kapasidade atu apresia buat furak sira no atu dirije an rasik iha autonomia atu hasoru eventu sira moris nian.

Laho maturidade afetiva, difisil liu kontinua hafoun hilin sira moris nian, tanba iha momentu ruma moris nian moris konsagrasaun husu solidaun. Nu'udar ema dala barak mosu sentimentu ta'uk bainhira individu tama iha momentu solidaun nian. Maibe, hanoin nafatin katak solidaun mak momentu loos nian iha-ne'ebe, ema ida hasoru malu ho nia an rasik, koñese no komprende se loos mak nia.

Ema konsagradu/a sira bele monu iha kompensasaun sira ka bele mos monu iha neuroze maizumenus evidente.

Laho maturidade afetiva sai partikularmente imposivel, atu hasoru ema ho seksu diferente, lori atu harii amizade ne'ebe laloos iha nivel psikiku ka moral.

Se la iha maturidade afetiva, individu sei hetan difikuldade atu harii relasaun loos ho mundu no ho realidade rai nian, sei sai difisil iha moris relasaun interpesoal ne'ebe klea'n, sei hasoru difikuldade atu jere didi'ak soin temporal sira no halo jestaun ba “poder” autoridade nian.

Kuaze imposivel ka susar iha individu ne'ebe afetivamente no psikikamente imatura (latasak), atu simu ho simplisidade no espontaneidade ema seluk nia prezensa, la iha kapasidade atu supera ka manan difikuldade iha vida komun (moris fraterna iha comunidade), susar atu haksolok iha momentu rekreiu/distensaun nian, susar atu simu esperiensia terus no salan nian, nu'udar estimulu ba renovasaun duke sai nu'udar pretestu ba depresaun (ez. moras ida ne'ebe individu mak kria rasik). Ita bele dehan katak kuaze imposivel, se la'os personalidade tasak, atu suporta ka tahan laran-susar/ansiedade iha eventu nakukun sira vida interior nian.

Ema hetan difikuldade atu tau hamutuk konstansia ho ksolok iha Maromak, hodi hala'o knaar apostoliku loroloron nian; sira hasoru difikuldade atu hetan ekilibriu ne'ebe loos entre asaun no kontemplasaun.

Nu'udar ema presiza rekoñese ho serenidade katak atu konsagra an ba Maromak no ba maluk sira iha Kreda, nesesariu atu ema iha nivel aas ida maturidade umana nian.

Atu iha perseveransa no iha santifikasaun konsagradu/a nian, presiza personalidade “umana” ne'ebe normal, saudavel, metin iha desizaun, harmonia. Fiar no pratika relijioza tuir norma, la to'o ka la suficiente, atu modifika estrutura psikika ne'ebe kleuk no mos situaun patolójiku pesoal.

Kandidatu/a sira ba vida konsagrada tenke hakbesik an lora ba lora ba moris ne'ebé nakonu (plenitude/fullness) iha vida afetiva ho itineráriu formativu ida (sériu no konstante), ne'ebé dura iha moris tomak, (dala barak ema para de'it iha etapa formasaun inisiál nian), atu nune'e indíviduu bele haksolok ho ninia hila no kontinua hatene simu diferença no moris iha armonia ho ema seluk, no konxiente katak atu bele haksolok nafatin ho ninia bolun ka vokasaun, importante liu atu indíviduu iha hakaran boot atu kontinua deskobre no konfronta an rasik, atu sai elementu konstrutivu, la'ós problemátiku liuliu iha vida komún.

Haree tiha ba peskiza husi estudiozu rua ne'e, hamosu iha ha'u pergunta ida-ne'e: Se nune'e bainhira no iha ne'ebé mak indíviduu bele sukat ninia maturasaun umana? Ninia resposta mak nu'udar konsagradu/a, fatin no tempu dahuluk no loos mak moris comunidade, no fatin no tempu daruak mak misaun lora-lora nian, iha ne'ebé indíviduu hasoru indíviduu seluk iha ninia relasaun interpesoál. Baze iha indíviduu nia esperiéncia lorolora mak ninia reasaun sira no mós ninia sentimentu sira; reasaun no sentimentu sira lori indíviduu tama kle'an hodi koñese liután sé mak nia.

Tanba ne'e bele dehan katak; la'ós ema hotu konsege integra ho armonia komponente sira: biolójiku, psikolójiku no espirituál sira, atu bele asume no moris ho intensidade proprialmente "umana" auténtiku, ho prezente ksolok nian hodi kontinua buka valór foun sira, ne'ebé kontinua mosu iha indíviduu nia moris lorolora.

Nune'e objetivu obrigatóriu mínimu ba indíviduu hotu mak: importante moris ho konxiénsia katak, indíviduu ninia haka'as an seidauk kompletu no la to'o: nune'e presizea no ezije atu iha hakaran boot atu kontinua haka'as an iha kreximentu konstante to'o konsege "umanidade" ida ne'ebé "nakonu ka realizada".

Bibliografia:

STEVANI Milena, *Per Una Autonomia Affettiva della Donna Consacrata*, Roma 2005.

FERRARI Gabriele, *Religiosi e Formazione Permanente. La crescita umana e spirituale nell'età adulta*, Bologna 1998.